



'T WAARK IS DOAN

Toneelstuk in drie bedrijven

deur

E. TORRENGA

TONEELUITGEVERIJ VINK B.V.
(Grimas Theatergrime verkoop)
Tel: 072 - 5 11 24 07
E-mail: info@toneeluitgeverijvink.nl
Website: www.toneeluitgeverijvink.nl

VOORWAARDEN

Alle amateurverenigingen die het stuk: **'T WAARK IS DOAN** gaan opvoeren, dienen in alle programmaboekjes, posters, advertenties en eventuele andere publicaties de volledige naam van de oorspronkelijke auteur: **E. TORRENGA** te vermelden.

De naam van de auteur moet verschijnen op een aparte regel, waar geen andere naam wordt genoemd.

Direct daarop volgend de titel van het stuk.

De naam van de auteur mag niet minder groot zijn dan 50% van de lettergrootte van de titel.

U dient tevens te vermelden dat u deze opvoering mag geven met speciale toestemming van het I.B.V.A. Holland bv te Alkmaar.

Copyright: © 1998 Anco Entertainment bv - Toneeluitgeverij Vink bv

Internet: www.toneeluitgeverijvink.nl

E-mail: info@toneeluitgeverijvink.nl

Niets uit deze uitgave mag verveelvoudigd en/of openbaar gemaakt worden door middel van druk, fotokopie, verfilming, video opname, internet vertoning (youtube e.d.) of op welke andere wijze dan ook, zonder voorafgaande schriftelijke toestemming van I.B.V.A. HOLLAND bv te Alkmaar, welk bureau in deze namens de Uitgever optreedt.

Het is niet toegestaan de tekst te wijzigen en/of te bewerken zonder voorafgaande schriftelijke toestemming van I.B.V.A. HOLLAND bv te Alkmaar, welk bureau in deze namens de Uitgever optreedt.

Vergunning tot opvoering van dit toneelwerk moet worden aangevraagd bij het Auteursrechtenbureau **I.B.V.A. HOLLAND bv**

Postbus 363

1800 AJ Alkmaar

Telefoon 072 - 5112135

Website: www.ibva.nl

Email: info@ibva.nl

ING bank: 81356 – IBAN: NL08INGB0000081356 BIC: INGBNL2A

Geen enkele andere instantie dan het IBVA heeft de bevoegdheid genoemde rechten van u te claimen, of te innen.

Auteursrechten betekenen het honorarium (loon!) voor de auteur van wiens werk door u gebruik wordt gemaakt!

Auteursrechten moeten betaald worden voor elke voorstelling, dus ook voor try-outs, voorstellingen in/voor zorginstellingen, scholen e.d.

Vergunning tot opvoering:

1. Aankoop van minimaal **8** tekstboekjes bij de uitgever.
2. U vult het aanvraagformulier in op www.ibva.nl of u zendt de aanvraagkaart (tevens bewijs van aankoop), met uw gegevens, naar I.B.V.A. Holland. Uw aanvraag dient tenminste **drie weken voor de eerste opvoering** in bezit te zijn van I.B.V.A. Holland.
3. U krijgt daarop de nota toegestuurd. Na betaling wordt u de vereiste vergunning toegestuurd.

Vergunning tot HER-opvoering(en)

1. U vult het aanvraagformulier in op www.ibva.nl of u zendt de aanvraagkaart met uw gegevens naar I.B.V.A. Holland. Uw aanvraag dient tenminste **drie weken voor de eerste opvoering** in bezit te zijn van I.B.V.A. Holland.
2. U krijgt daarop de nota toegestuurd. Na betaling wordt u de vereiste vergunning toegestuurd.

Opvoeringen zonder vergunning zijn niet toegestaan en strafbaar op grond van de Auteurswet 1912. Zij worden gerechtelijk vervolgd, terwijl de geldende rechten met 100% worden verhoogd. Het tarief wordt met 20% verhoogd voor opvoeringen waarvoor geen toestemming werd aangevraagd binnen drie weken voorafgaand aan de voorstelling.

Het is verboden gebruik te maken van gekregen, geleende, gehuurde of van anderen dan de uitgever gekochte tekstboekjes.

**Rechten BELGIË: Toneelfonds JANSSENS, afd. Auteursrechten,
Te Boelaerlei 107 - 2140 Bght ANTWERPEN Telefoon (03)3.66.44.00.
Geen enkele andere instantie heeft de bevoegdheid genoemde rechten van u te claimen, of te innen.**

SPEULERS:

Rieks Ezengoa - aigenoar van een loonbedrief

Griet - zien vrouw

Gaarnt - heur zeun

Fientje - heur òldste dòchter

Cisca - heur jongste dòchter. Een speulse, nait op heur mondje vaaln,
jonge spring ien't veld

Truus - buurwichtje, vriendin van Gaarnt

Riepko Mennes - kunstenoar, vlinnervanger, òf toch wat aandere?
Hai proat wat troag

Menno Diekstroa - een òlle buurman. Menno löpt mit handstok, hai
hèt een stief bain. Hai lugt dat het gedrukt staat.

4 doames en 4 heren

EERSTE BEDRIEF

(het is een mooie zommermirreg. Als 't gediën opengait binnen Griet en Fientje op 't toneel. Fientje zit ien een tiedschrift te lezen en Griet is aan 't strieken)

FIENTJE: Hai, wat is't waarm vandoag. Ik dou de haile dag aandere niks als zwaiten.

GRIET: Joa. 't Is bruiereg. Het zol mie niks verwonneren als er straks een dunnerbui komt.

FIENTJE: Dat geloof ik nait. Lucht zet zich nog niks.

GRIET: Dizze sokken van pa huiven wie nait weer wassen. Er zit gain schik òf fersoun meer aan. Mos nou ains zain. Ze zitten vòl goaten. Als ik ze opvòl en ien kaast leg, trekt pa ze zo ook weer aan. Hai wòrt mit de dag roeger.

FIENTJE: Joa, pa is slim roeg. Is dat altied zo west?

GRIET: Nee, dat wòrt de leste tied aal aarger. Hai, ik ben er eerst zat van heur, het is mie te waarm. *(ze wist heur zwait van kòp òf en baargt striekspul op)*

FIENTJE: Ik zel ains even kieken, òf pa en Gaarmt er aal weer aankomen. Ik hoop mor dat het een beedje mitvaaln is mit Gaarmt. Ik durf te wedden dat zien bain broken is. *(gaait stoan)* Ik heb echt mit hom te doun.

GRIET: Joa, doar ben ik ook baang veur.

FIENTJE: Is Truus aigelk aal wel woarschouwd?

GRIET: Joa, Diekstroa zol even bie heur thoes aangoan, om te vertellen wat er gebeurd is.

FIENTJE: Als dij het nou mor nait te veul opdikt. Joe waiten hou Diekstroa is. Hai moakt sums van een mug een eulifant.

GRIET: Dat zel wel een beedje mitvaaln. Mor wat ik veul aarger vien, is dat het nou net gebeuren mout, nou het zo drók begunt te wòrren mit combainen. Ik mout er nait aan denken. Nou Gaarmt oet de running is en nait mit helpen ken, hou kriegien wie ons waark nou doan? Ik zo! 't nait waiten.

FIENTJE: Dat wait ik ook nait. Den mout pa mor pebaaiern om een lösse aarbaider te kriegien.

GRIET: Doar huifs doe nait op te reken. Dat soort minsen binnen er nait veur 't opscheppen. Hailemoal nait ien 't dròkste van tied. Mor als het nait hoger òf leger wil, mos doe mor wat mithelpen.

FIENTJE: Ik??? Mor ik heb nog nooit op zo'n mesien zeten! Den kennen joe beder Cisca vroagen. Dij is bie tieden toch net een vent.

GRIET: Dij helpt van heur zulf wel mit. En alles is te leren. Boetendes

er is ook aander waark genog.

FIENTJE: Ik wait het nog nait heur, ik ben doodsbenauwd op zo'n mesien! Loat Truus mor veur Gaarmt ienvaaln, dij hèt op 't oognblik toch gain waark, en dij hèt wel voaker op een combain zeten. Ik zei ains even kieken, òf pa en Gaarmt er aal weer aankomen. (*löpt noar roam*) Mam, joe kriegen weer een proater!!! Diekstroa komt er aan. (*Fientje rechts òf*)

GRIET: Diekstroa ken pad hier ook wel waarn hòllen.

MENNO: (*rechts op*) Gòiemirreg, Griet, doar ben ik weer. Ik kon het thoes nait meer oethòllen. Binnen ze nog nait terug? Wais aal hou 't òflopen is?

GRIET: Ze binnen er nog nait weer, Diekstroa. Ik ben aans ook wel nijschierereg. Binnen joe ook bie Truus heur hoes langs west?

MENNO: Joe, ik ben er west en ik heb het tegen heur moeke zegt. Truus was er nait, mor zo gauw als ze thoes kwam, zollen ze het heur vertellen. Hou is't aigelk komen?

GRIET: Het was net tegen etenstied en Gaarmt wol dat leste èndje nog vlug even doan moaken, den was hai daar kloar. Hai is dou te dicht bie sloot komen en is mit 't haile spul er ien doekelt. Wie hemmen hom doar aal zo voak veur woarschouwd. Mor hai is sums ook zo aigenwies.

MENNO: Joe, wat dat betreft hèt Gaarmt sums een bred veur de kòp.

GRIET: Op 't leste moment wol Gaarmt van combain òfspringen. Hai kwam hail ongelukkeg terecht. Bain kwam dubbel onner hom en stond er hail schaif aan. Ik ben baang dat hai broken is. (*gaait stoan en kikt even noar boeten*).

MENNO: Den zellen ze hom nou wel ien cement pakken.

GRIET: Hou bedouln joe dat?

MENNO: Ik ben vrouger, als kwoajong zijnde, ains mit fiets op kòp tegen een auto aanreden. Ik heb mien bain dou broken; op verschaaiden ploatsen. Kiek, ik maag hier blind wòrren, als 't nait woar is, mor ik laig er nait om. De bonken vlogen overaal hin. (*dit is een vast gezegde van Menno en elke keer als hai zegt dat hai hier blind wòrren maag, legt hai zien haand op borst*) Mor dokter hèt hom best weer kloar kregen. Hai hèt mie er portland cement om tou smeert. Zes week hèt dat er om tou zeten, dou was hai weer hail.

GRIET: Diekstroa, dat was gain cement. Dat heb ik joe aal voaker zegt. Het was gips. Boetendes dut dokter dat nait meer. Tegenwoordeg gain je noar 't zaikenhoes.

MENNO: Mor 't was zo haard als een bikkel.

GRIET: Mor het was wel gips!!!

MENNO: Nee, portland cement. Hai hèt het er loater weer mit'n biel om tou wegkapt.

GRIET: (*schudt wat mit kòp, zucht*) Dat was vrouger, Diekstroa! En vrouger haren ze laange aarms en grode oren. Ien dizze tied gaat dat hail aandere.

MENNO: Joa, dokters binnen tegenwoordeg gauw kloar. Als ze het nait meer aan kennen sturen ze de mensen mor noar stad. Makkelk zat. Zo ken ik ook wel dokter wezen. Ik heb vrouger ains last mit mien oogn had. Ik er mit noar dokter. Dij loerde mit een verrekieker ien mien oog en zee dat er wat voeleghaid aan de achterkaant zat.

GRIET: Hou zain ze 't hè???

MENNO: Ik maag hier blind wòrren, (*haand op borst*) als 't nait woar is. Kins 't geloven òf nait, mor ik laig er nait om. Hai pakte mien oog er oet en hèt hom ompaalt onner wodderkroan.

GRIET: Nou, nou! En dat mout ik geloven?

MENNO: Joa, toch is't woar. En dij dokter hèt 't oog er zo weer ienstopt en... kloar was kees.

GRIET: Hou bestaat het, hè??? (*gnivvelt wat*) Joa, vrouger konnen ze er wat van.

MENNO: Nou, en 't is een aangetrouwde neef van mien zuster ains overkomen, dat eh....

GRIET: (*veur 't roam*) Ze komen er net weer aan. Ik ben benijd hou het òflopen is mit Gaarmt. Hai zit achterien auto. Hai komt er nou oet. Volgens mie hèt hai zien bain ien 't gips. Hai löpt teminste op krukken.

MENNO: Den is zien bain broken. Dat wait ik van miezelf, dou ik vrouger mien bain broken heb. Bonken stoven ale kanten op. Ik heb er vief moand mit ien gewoapend beton zeten.

GRIET: Vief moand zeden joe toch?

MENNO: Vief moand ja! En blouden dat het dee! Ik maag hier blind wòrren (*haand op borst*) als 't nait woar is, en laigen dou ik er nait om, mor ze konden wel bloudwòrst van aal dat bloud moaken, zoveul was ik kwiet wòrren.

GRIET: (*lagt*) Het wòrt mie nou gek genug, Diekstroa. Dat is vast ook joaren leden. Wie kennen joen verhoalen langsoamerhaand wel. Vrouger hadden de òllen ook meer verstand.

MENNO: Mor de mensen haren vrouger veul meer bloud als nou. Òf 's doe dat nou geloven wilt òf nait, toch is dat zo. En ze jammerden ook nait zo gauw. (*tegen Griet*) Mor ik zol die nog van mien vrouw heur aangetrouwde achterneef vertellen, hé? Nou, dat was een kerel als een boom, mor ienains, man....

GRIET: Doar komen ze aan! (*Rieks, Fientje en Gaarmt op. Gaarmt*

löpt op krukken) En??? Hou is't òflopen?

RIEKS: Stukkend. Doar is hai een poar moand schier mit, zee dokter.

GRIET: Hèt die 't ook zeer doan, Gaarmt?

GAARMT: *(ze gaan allemoal zitten)* En goud ook! Veuraal dat rechtzetten hèt mie ontiegelk zeer doan. Het was een gecompliceerde breuk zee dij dokter. Ze mossen mie vast hòllen, want ik kon dij man wel veur de kòp sloagen, zo zeer hèt hai mie doan.

GRIET: Zel ik even een voutenbankje onner dien bain doun? *(dut dat)* Zo, nou kins bain door op leggen.

FIENTJE: Dut het nou ook nog zeer? *(gaait bie hom stoan en strikt deur 't hoar)*

GAARMT: Och, ik ken het nou wel oethòllen.

FIENTJE: Als het die goud zeer doan hèt, den is 't ook goud lukt.

GAARMT: Och, krieg om mie wat. *(wil heur een tik mit zien kruk geven)*

MENNO: Den haar ik er vrouger meer pien aan.

GAARMT: Hemmen joe joen bain den ook aal ains broken had?

MENNO: Joa jong, mor veul slimmer. Ik ben ains mit fiets tegen een auto aanreden. 'n Smak jong! Mien bain laag ien ale groezelementen. Ik maag hier blind wòrren, *(haand weer op borst)* als 't nait woar is en ik laig er nait om, mor de botten vlogen ale kanten op en 't bloud stroomde mit een stroal ien sloot.

RIEKS: *(narreg)* En laigen dut hai er nait om! *(de aandern laggen)*

MENNO: Joa, lag er mor om. Mien vrouw was achter 't hoes bonen aan 't plukken en dij kwam runnend op 't geluud òf. "Wat knapte hier toch zo?" vroug ze. Kiek, dat hèt mien bain west, hè!! Dokter hèt boudel weer bie mekoar zocht en er dou nog een iezern pen bie ienstopt. Beton er om tou, doar mos ik aacht maand mit lopen.

FIENTJE: Aacht moand!!! En dij stang den, Diekstroa????

MENNO: Dij zit er nog ien. Mor dij kennen je vanzuif nait zain.

FIENTJE: Pas mor op, Diekstroa, dat hai nait begunt te rousten.

MENNO: Wat wicht, wat gaat er rousten?

FIENTJE: Dij pen ien joen bain, Diekstroa. Stel joe veur dat dij begunt te rousten.

GAARMT: *(tegen Griet)* Ik hoop nait, dat ik zo laig, als ik zeuventeg ben.

GRIET: *(tegen Gaarmt)* Hes nog een haile zet tied, mien jong! Kins ien tied nog hail wat op bedenken.

GAARMT: Hemmen joe Truus aal woarschouwd?

MENNO: Joa, doar ben ik even langs west. Ze was nait thoes. Ze zollen het heur zo vlug meugelk vertellen.

GRIET: *(tegen Rieks en Gaarmt)* Gaarmt zel wel zin aan een kòp kovvie hemmen, denk ik. Zel ik die een kuzzen onner bain doun, Gaarmt?

GAARMT: Nee, dat huift nait. Ik goa straks toch even rusten.

RIEKS: O... en doch's dat ik door gain zin aan heb.

GRIET: Fientje, hoal doe kovvie even op. Den zet ik kòpkjes alvast kloar. *(Fientje stoan en midden òf. Griet tegen Rieks)* Doe hes dien bain nait kepot! Òf mout ik mit die ook medelieden hemmen en wilt doe ook een pooske ien de watten legt wòrren.

RIEKS: Het zol nait best wezen, als ik óók nog een bain kepot haar! Wel zol 't waark hier den doun mouten? En de boeren willen netuurlek wel op tied heur zoad van 't laand òf hemmen. *(Fientje op mit kovvie en begunt ien te schenken)*

GRIET: Dat zei zich nou ook wel weer redden.

RIEKS: Vrouwluuproat. Mit vaaier week mouten ale stro vruchten van wòddel òf wezen. Hou willen joe dat veurmekoar kriegen?

FIENTJE: Ik heb aal tegen moeke zegt: Joe mouten zain, dat joe er zolaank een noodhulp bie kriegen.

RIEKS: Zo, hes doe dat aal tegen moeke zegt. Mos nait denken dat noodhulpen er veur 't opscheppen liggen. *(tegen Gaarmt)* Wat dus ook net ien't dròkste van tied dien bain te breken.

FIENTJE: Moeke zee zonet aal. Er ken nog wel eens een dunnerbui komen.

GRIET: Nou bis nait redelek, Rieks. Gaarmt hèt 't er toch zeker nait om doan?

RIEKS: Dat mout er ook nog biekomen! Mor waarom komt hai tussen Kerstdoagen en Nijjoar nait mit dat mesien ien sloot, den kennen wie 't wachten.

GRIET: Omdat joe om dij tied nait meer mit een combain op't laand binnen. Nou mos nait zo stom proaten.

MENNO: Dou ik mien bain broken heb, was 't net òljoarsdaag.

GAARMT: Heur ik dat goud? Joe zeden toch òljoarsdaag, Diekstroa. Joen vrouw was dus midden ien de winter ien toen aan bonen plukken.

MENNO: Mien vrouw?

GAARMT: Joa, doar haren joe het zonet over. Dij heurde 't knappen. En ze was aan bonen plukken!

FIENTJE: Joe kennen het mooi vertellen, Diekstroa. *(gaait staan en midden òf)*

MENNO: Zee ik dat? O joa... joa... zai was aan 't bonen plukken. Joa, net als ik zee; zai heurde het knappen. Hai was den ook ien ale groezelementen. Ik maag hier blind wòrren, *(weer hand op borst)*

als 't nait waar is en ik laig er nait om, mor de bonken dij stoven

RIEKS: Zo ver weg, dat ze bie dokter ien toen terecht kwammen.

MENNO: Nee, zo wied kwammen ze nait. Mor ik heb bain toch tien moand ien gewoapend beton had. Ik heb vrouger een kammeroad had, hè.... 'n boom van een kerel, dij kreeg ienains midden overdaag....

CISCA: *(komt links op ien nedde klaaier, schoultas bie heur, dij onverschilleg ien een houk goeit wòrt. Ze is een jonge maaid dij aal heur vrije uren op 't bedrief rondlöpt ien een toenbroek. Het is een echte biedehandje)* Wat heurde ik ien 't dörp. Het Gaarmt een ongeluk had?

GRIET: Joa, hai hèt mit combain ien sloot zeten en doar hèt hai zien bain bie broken.

CISCA: Mit combain ien sloot zeten? Wol meneer weer stoer doun? Mos weer iendruk moaken, bruijerke? Hou laang mos mit bain ien gips lopen?

GAARMT: Vòlgens Diekstroa tien moand mit bain ien gewoapend beton en bonken liggen bie dokter ien toen.

CISKA: *(verboasd)* Hè????!!!

GAARMT: Nait van mie heur! Ze lagen er nog van Diekstroa. Dij hèt vrouger ook 'n bain broken had.

CISCA: O!!! *(begriipt 't nou)* Joa, en dij hèt het vanzuif veul slimmer had. Dat wil ik direkt wel geloven.

MENNO: Joa wicht, dat zel ik die ains vertellen.

GRIET: Nee, Diekstroa. Dou dat nou nait. Cisca ken nait over zukke proatjes. En veuraal nait als er bloud aan te pas komt.

MENNO: O, nee?Bis doe zo'n haalfgebakken mietje????

CISCA: Ik wait nait òf joe het aal zain hemmen, mor ik zag zonet een vremde vent om't hoes tou lopen. Hai is hailemoal bepakt en bezakt. Waiten joe wel dat is en wat hai hier te zuiken hèt?

RIEKS: Nee, doar is mie niks van bekend. *(tegen Griet)* Of wais doe doar wat van.

GRIET: Ik heb gain minsk zain en ik weit ook naargens van.

RIEKS: *(tegen Cisca)* Hes hom den nait vroagt òf hai hier wat verloren hèt?

CISCA: Nee, dat wol ik wel doun en ik ben ook wel goan kieken, mor ik heb hom nait meer zain. Ik vond het nogal verdacht. Wat veur vent het is, wait ik nait, mor allain aal de klaaier dij hai aan hèt. Het is een vremde vogel.

MENNO: Ik zol mor oetkieken, als ik joe was. Er is de leste tied nogaal ains ien broken ien de buurt. Vannaacht nog ien dörpshoes 't Centrum. Er schienen hier een poar van dij stufkickers rond te

hangen en men denkt dat dij doar ienbroken hemmen.

RIEKS: Den mouten wie ons oogn en oorn mor goud de kost geven. Straks binnen wie aan de beurt.

CISCA: Mor nou ains wat aandere. Hou mout het nou verder mit 't waark, pa? Kennen joe joe nou wel redden?

RIEKS: (*narreg*) Hou het verder mout? Òf ik mie redden ken? Ik zol het op 't oognblik nait waiten. Als doe er mor om denks, da's doe gain ongeluk krigs, want den wait ik hailemoal nait meer hou 't mout. Nou kins doe ons teminste nog een beedje mithelpen.

GRIET: Vòlgens mie kriegen wie zwoar weer!!!

MENNO: (*wil gaan staan*) Den mout ik ja moaken dat ik thoes kom. (*zitten*) O, ja. Ik zol joe nog vertellen van dat geval van dij zwoager van mien zuster...

RIEKS: Dat kennen joe ons loater wel vertellen, Diekstroa! Doar hemmen wie nou gain tied veur.

MENNO: Joa. Loat ik dat mor doun. Mor als doe mie nog ains neudeg bis, mit 't waark bedoul ik, Rieks. Ik wil die wel een beedje mithelpen.

CISCA: Veldmoezen vangen op 't laand zeker! Diekstroa, joe binnen zo vlug als dikke stroop ien een dunne trechter.

GRIET: Nait ploagen, Cisca! Het is goud bedould.

RIEKS: (*goudeg*) Nee Diekstroa, best aanboden. Joe hemmen aal muite om te lopen. Loat stoan mit waarken. Doar binnen joe te òld veur.

MENNO: Nou ja, joe mouten 't mor bekieken. Eerst gòiedag. En beder schop, Gaarmt heur.

GAARMT: Insgelieks, Diekstroa. (*ze zeggen Diekstroa allemoal gòiedag en dij gaat rechts òf*)

GRIET: Maggen zeggen van hom wat joe willen, mor er zit een goud haart ien.

GAARMT: (*gaait stoan*) Kom, ik goa eerst even een pooske op bèr.

GRIET: Wilt gain kovvie meer hemmen, Gaarmt?

GAARMT: Heb ik gain zin meer aan, moeke. Ik heb wat last van mien bain. Dij begunt mie weer zeer te doun.

GRIET: Is te begriepen, jong. Als Truus er is, sturen wie heur wel noar die tou.

GAARMT: Dat is goud. Zo gauw ze thoes is, komt ze vast hierhin. (*Gaarmt löpt noar deur midden*)

RIEKS: Eh... Gaarmt... Ik was zonet wel wat narreg tegen die, omdat... eh... het nou zo tegenlöpt mit 't waark, mor... eh... ach, wat proat ik... Moak nou mor da's op bèr komst!

GRIET: (*gaait stoan, klópt Rieks even op schòller*) Olle brompot!!! Bis

ien auto weer tegen hom oetvoaren. (*den links òf*)

RIEKS: Woar hemmen ze 't mesien hìn zet, Cisca?

CISCA: Onner kapschuur, pa.

RIEKS: Ik hoop nait dat er veul aan kepot is.

CISCA: Ik heb zain dat er een monteur om tou laip. Messchain vaalt het een beedje mit.

RIEKS: (*zucht*) Ik zel er straks eerst eins even hìn goan. Ik zai mie er een gat mit ien kòp, hou het nou verder mout.

CISCA: (*laggend*) Den vroegen joe Diekstroa toch? Dij hèt zichzulf aanboden.

RIEKS: Nou gain gekhaid, Cisca. Ik heb nou wel wat aans aan mien kòp. Wie kwammen aans aal ain man te kort en nou Gaarmt zien bain broken hèt, komen wie er aal twij te kort.

CISCA: (*op dit moment komt Truus deur rechter deur op*) Doar komt joen hulp net aan, pa. Nou Gaarmt oetschoakelt is, ken Truus zien waark mooi overnemen.

TRUUS: Ik heurde thoes dat Gaarmt een ongeluk had hèt. Woar is hai en hou aarg is het?

RIEKS: Het vaalt wel een beedje mit. Hai hèt zien bain broken. Goa straks mor even noar hom tou. Hai is net even op bèr goan liggen.

CISCA: Komt veur die mooi oet, Truus! Doe hes op dit moment toch gain waark. Nou kins doe ons mooi mithelpen mit combainen.

TRUUS: Messchain dou ik dat wel. (*tegen Rieks*) Komen joe nou ain man tekort, Ezengoa?

RIEKS: Joa. Ik wait nait hou wie 't waark nou doan kriegen, dat is mie nog een roadsel.

TRUUS: (*monter*) Dat ken nog wel ains mitvaaln.

RIEKS: O, ken dat wel ains mitvaaln???? Nou loat ains heuren den!!

TRUUS: Nou, net als Cisca zegt. Als ik joe nou ains help?

RIEKS: Doe???? Wais wel wat doe zeps??

TRUUS: Joa, waarom nait? Ik heb thoes wel voaker op een combain zeten.

CISCA: Ik heb 't joe aal zegt, pa. Truus staat te springen om ons mit te helpen.

RIEKS: Ik ken Truus toch nait op zo'n combain zetten.

CISCA: Woarom nait? Ze hèt er toch voaker op zeten bie heur thoes. En aandere ken ze toch wel wat aandere doun?

TRUUS: Dat dòcht ik ook. Trekker rieden dou ik wel voaker. En stro ien pakken moaken? Dat mout toch ook doan wòrren?

RIEKS: Joa, wat nait ken... 't Wòrt er ien elk geval een stuk makkelker van. Mor ik heb aigeik meer verlet om een flinke kerel.

CISCA: Den help ik toch ook mit? Ik durf wel op een combain te

rieden. Het zol mie wat wezen.

TRUUS: Nou mouten joe spuit elf ains heuren! Ain keer hail stief poesten en ze waait over schuur hìn. Ze is nog mor zeuventien joar en dut net òf ze de haile wereld aal wel verroppen ken!

RIEKS: *(ien gedachten)* Loaten wie het toch mor ains mit Truus pebaaiern. Den zel ik mien program wel een beedje bie stellen. Boetendes, Cisca, doe gaais overdaag nog noar schoul en kins allain mor noar schoultied mithelpen. *(gaait stoan)* Mor ja... toch kom ik nog altied ain man tekòrt. Dekselse boudel is't. Verlet om ain kerel! *(gaait rechts òf)*

CISCA: Hemmen een haile bult last van. Truus en Fientje ook.

FIENTJE: *(midden op)* Woar hemmen wie verlet om Cisca?

CISCA: Verlet om een kerel.

TRUUS: Ik heb mien Gaarmt aal en dij goa ik nou ains flink verwennen. *(midden òf)*

FIENTJE: Nou hes het heurd. Truus hèt Gaarmt en als ik verlet krieg om 'n kerel, zel ik wel mit een bèl deur dörp hìngoan. *(bèl gaait)*

FIENTJE: *(stoan)* Wel ken doar nou wezen!

CISCA: Mos goan kieken.

FIENTJE: *(stoan)* Dat dou ik ook wel, want doe dus dat toch nait. *(rechts òf)*

CISCA: Zo, nou heb ik de roemte. *(legt heur vouten op toavel en gaait zo zitten dat ze mit rug naar rechterdeur zit. Pakt kraant en begint te lezen)*

FIENTJE: *(rechts op mit Riepko dij tropengoud aan hèt. Een broek dij net over zien knijen komt. Hai hèt een houd en een donkere bril op)* Kom er mor even ien, den zei ik ains even kieken òf ik pa vienen ken. Willen joe een kòp kovvie?

RIEPKO: Dat sloeg ik nait òf, bedankt.


FIENTJE: Ik zel even nije kovvie zetten. *(ze neemt kovviepot mit en gaait òf. Riepko kikt Fientje bewonnernd noa, dij midden òf gaait, kikt rond en zicht den Cisca, gaait vlak achter heur stoan en zegt hard)*

RIEPKO: Gòiedag. *(Cisca goeit van schrik heur bainen van toavel en springt omhoog)*

Als u het hele stuk wilt lezen dan kunt u via www.toneeluitgeverijvink.nl de tekst bestellen en toevoegen aan uw zichtzending.

Voor advies of vragen helpen wij u graag.

 info@toneeluitgeverijvink.nl

 072 5112407



“Samenspelen” is ons motto